

# Yut

---

<sup>1</sup>O bukulpne,

Awoŋnenŋe Anitâŋe wawaeyekmâ mem hewewej tuhuyekmu Yesu Kiristohâlen biwiyenŋe katbi. Yawu otbi yan Anitâŋe meyekmâ Kiristoŋe himbimâmbâ âwurem ge meyekbuapgât pat kuyiŋgimu manmai. Nâ Yut, Yakowo imiŋe. Nâŋe Yesu Kiristo hoŋ bawangim manman. Yakât otmâ yenggât nâŋgâm ekap yu kulemgum katyiŋgian.

<sup>2</sup>Otmu yenggât nâŋgâm Anitâ yuwu sâmu ulitguman. “O Awoŋ, gâŋe bukulpne yenggât nâŋgâyiŋgim mem hewewej tuhuyekdâ yanâmâ yâk yenggât biwiyenŋe sânduk sâmu buku oraŋgim mannomaihât nâŋgâm ulitgohoan.” Yawu sâmu ulitguman.

## Lok perâkŋaŋe Kiristohât den kelaŋgatminiwi.

<sup>3-4</sup>Bukulpne, yuwu sâmune nâŋgâŋet. Anitâŋe yen orop manman kârikŋahât pat kuniŋgiop. Pat kuniŋgiop yakât bulâŋe menom sâmu girawu manŋetâ yekmu ârândâŋ otbuap yakât topŋe kulemgum katyiŋgian. Yawu gârâmâ emelâk lok nombotŋaŋe Anitâhât nâŋgâŋetâ gemu betbangim topyene kurihiakmâ yenggâlen torokatbi. Yenggâlen torokatbi yapâek yu ya ekŋâlem tepyene yahatmu otmâ hilipgum gai. Yawu otmâ eweakmâ tosa ya kârâm Kiristohâlen pilâm yuwu sâmai. “Kiristoŋe girem den yapâ holaŋnenehop. Yakât otmâ nenŋe engatnenŋeâk watmâ yu ya ihilâk otnom,” sâmai. Yawu sâmai yan Kutdânenŋe Kiristo Tihit tihit Amboŋe yâk mem ge katmâ yâkât den kelaŋgatmâ lohimbî den perâkŋe kâityongom engatyenŋan gemai. Yâhâ Kiristoŋe Anitâhât den bulâŋe nen aposololipŋe kâsikum niŋgiop. Otmu nenŋe den yawuâk yen kâsikum yiŋgim gain. Otmu lok perâkŋaŋe yenggât engatyenŋan gem nâŋgân nâŋgânyene mem hâlim tuhuyiŋgimaihât yene Kiristohât den tâŋ tâŋâk watmâ manŋetgât pepa yu kulemgum katyiŋgian. Yâhâ lok perâkŋaŋe matŋe mem hiliwahonomai yakât emet inânŋan Anitâhât hoŋ bawalipŋaŋe den kulemguwî.

<sup>5</sup>Den kulemguwî yakât topŋe nâŋgâm heŋgeŋguai. Yawu gârâmâ den ya mem mete tuhum manŋetgât yuwu sâmune nâŋgâŋet. Kândikum emelâk Isirae lohimbîŋe Aihita hânân umatŋe kakŋan manminiwi.

Yawu manjetâ Kutdâŋe manman âlepŋan katyekbe sâm den ekyongomu nâŋgâŋetâ bulâŋe otmu Aihita hân pilâwi. Pilâm taka lok ki manmaiâŋgen manbi yan Anitâŋe den âlâ ekyongop ya nâŋgâŋetâ ki bulâŋe olop. Yakât otmâ Kutdâŋe matŋe yingimu mem hiliwahowi.

<sup>6</sup> Aiop, emelâk embâŋân Anitâhât aŋelolipŋaŋe otmâ hilipguŋetâ matŋe yingiop ya yengât yuwu sâmune nâŋgâŋet. Anitâŋe aŋelolipŋe âi yingimu mewi. Yâhâ aŋelo nombotŋaŋe âi yingiop ya hâkân otmâ pilâwi. Yawu otbi yakât matŋe nâpumân pilâyekmu ge omoŋ kâlehen tatmâ gai. Yawu tatmâ yâhâŋetâ sâp pato tetewuap yan den sâm hâreyingim matŋe umatŋe yingimu mem hiliwahonomai.

<sup>7</sup> Aiop, kapi yâhâp, kutyetŋe Sotom otmu Gomora, otmu kapi tipi tapi hâlânŋmâ tatmâ ariop ya ambolipŋaŋe aŋeloŋe otmâ hilipguwi yawuâk otmâ hilipguwi. Yâkŋe kâwâ konda otmâ orotmeme ki orotŋe yawu otmâ manminiwi. Yakât matŋe kâlâpŋe himbimângembâ gem punduŋ sâm sem gulip tuhuyehop. Sotom otmu Gomora kapi ambolipŋaŋe otŋetâ bâleop yakât dopŋeâk lok perâkŋaŋe orotmeme bâleŋe tâtâem otmai. Yawu gârâmâ yâkŋe Sotom otmu Gomora kapi yakât den pat nâŋgâŋetâ keterakyingimu Anitâŋe yeŋe orotmemeyeŋe bâleŋe yakât matŋe yawu yingimu menomai yakât topŋe nâŋgâmbâi.

<sup>8</sup> Aiop, Isirae lohimbiŋe otbi, otmu aŋelo nombotŋaŋe otbi, otmu Sotom otmu Gomora kapi ambolipŋaŋe Anitâhât den kum otŋetâ bâleop yakât dopŋeâk lok perâkŋaŋe yuwu otŋetâ bâlemap. Yâkŋe aman topŋe topŋe ekmâ yakât nâŋgâŋetâ yahatmu Kutdâhât den kum kâwâ konda otmai. Otmu Anitâhât aŋelolipŋe ikŋe orop himbimân tatmai ya yengât nâŋgâŋetâ gemu sâm bâleyingimai. <sup>9</sup> Otmu aŋelolipŋe yengât kunyeŋe, kutŋe Mikae sâm, yâkât wâtŋe pato tatbaŋgiap. Yawu gârâmâ emelâk tâmbâneneŋe Mose muop. Mumu Mikaeŋe hanguwe sâm otmu yanâk Satan orop nekamân olowot. Yawu otmutâ Mikaeŋe Anitâ ewewaŋgim Satan yuwu sâm hârewaŋgiop. “Anitâ ikŋak matŋe gihiwuap.” Yawu sâop.

<sup>10</sup> Anitâŋe soŋgo bau otmu nâi seloŋ topŋe topŋe kalop ekmain yamâ umut biwiyene bia. Yakât dopŋeâk lok perâkŋaŋe umut biwiyene bia yawu manmai. Yâkŋe yu yakât topŋe nâŋgâm pâpŋum ihilâk sâm bâlemai. Otmu yu ya ekŋâlem ihilâk otmai yaŋe manmanyene mem bâleyekmu mansai. <sup>11</sup> Yawu otmai yakât Anitâŋe matŋe amokŋan yingimu menomai. Emelâk lok âlâ, kutŋe Kain, yâkŋe imiŋahât nâŋgâm bâleop yakât dopŋeâk lok perâkŋaŋe lohimbi nâŋgâm bâleyingimai. Otmu emelâk lok âlâ, kutŋe Bileam, yâkŋe hâmeŋe membom nâŋgâm Isirae lohimbiŋe otŋetâ bâleâkgât sait kakyenŋan pilâwe sâm olop. Yakât dopŋeâk yâkŋe hâmeŋahâlâk nâŋgâm Kiristohât den kelaŋgatmâ lohimbi kâsikum yingimai. Otmu emelâk, lok âlâ, kutŋe Kora, ikŋahât nâŋgâmu yahatmu Mose mem ge katbe sâm olop yakât dopŋeâk lok perâkŋaŋe

Kiristohât aposololipņe nen mem ge katnenekne sâm oai. Yakât Anitâņe matņe amokņan yingimu mem hiliwahonomaihât pat kuyingimu mansai. <sup>12</sup>Otmu yen menduhuakmâ sot nemai yan yengâlen torokatmâ to kârikņe nem biwiyenę hâlim otmu otņetâ bâlemu aņun yingimai. Yawu otmâ yeņahâlâk nâņgâņetâ yahatmu otmâ hilipgumai. Ya yengât topyeņe nâņgâņetâ keterahâkgât den âlâen hâum sâmune nâņgâņet. Elem kârikņe mem emet mem maņgumap yamâ gelâk ki gemap. Otmu kâpi kâmetmain yaņe esen yambuņarņak pato otmap yamâ bonņe âlâ ki kinmap. Yakât dopņeâk lok perâkņeņe den âilongo lohimbi ekyongomai ya nâņgâņetâ den yaņe buku ki meyingimap. Otmu kâpi ya hârâtņe kum pilâmunņe hâlâlâņ sâmu lâum menduhum katmâ kâlâwân umunņe semap. Yakât dopņeâk Anitâņe lok perâkņe matņe umatņe yingimu hem kâlâwân kioņnomai. <sup>13</sup>Otmu siru memu saru pato pilâmap yan saru tuņ sâmu gaharaņe tetemu ekmain. Yakât dopņeâk lok perâkņe yengât orotmemeņe bâlęe tetemu aņulakmai. Otmu omoņe pitu kinmu ekmain ya omoņeâk tetembisâpgât Anitâņe kalop. Yakât dopņeâk lok perâkņe yengât nâņgâm Anitâņe omoņ bâlęeņan tatmâ yâhâmbisâihât pat kuyingimu manmai.

<sup>14</sup>Otmu emelâk lok âlâ, kutņe Enoko, Aramgât sen ya tetem gaņetâ gaņetâ komot nombolân yâhâp olop yan teteop. Yâkņe emelâk emet inâņņan lok perâkņe yengât yuwu sâop.

“Sâp pato tetewuap yan Kutdâņe aņelolipņe kiņgitņe orowâk meyekmu himbimâmbâ genomai. <sup>15</sup>Himbimâmbâ genomai yan Kutdânenņe lohimbi kerek nengât biwinenņe ekmâ sâm hâreningim otmain memain yakât matņe dopnenņanâk kâpekningiwuap. Otmu lohimbi nombotņeņe kunyeņe kârikņe otmu Anitâhât den kakņan sâmai, otmu nombotņeņe yâkât den kum orotmeme bâlęe tâtâem otmai yâhâmâ matņe amokņan yingimu menomai.” Yawu sâop.

<sup>16</sup>Lok perâkņeņe yeņe engatyeneâk watmâ yu ya otņetâ bâlemap. Yawu otmâ yeņahât nâņgâņetâ yahatmu hâkyeņe mepaemai. Otmu lohimbi nombotņeņe nâņgâyingięņetâ yahatmu senņe âlâlâ tânyongoņetgât mem lohotņe tuhuyekmai. Otmu orotmeme bâlęe otmai yakât huhopņe yamâ umatņe âlâlâ kakyenęan yâhâmap. Yawu teteyingimap yan yakât sâm guhuņmâ tosa yu lohimbi nombotņe yengâlen kârâm pilâmai.

### Girem den ekyongop.

<sup>17</sup>Bukulipne, yuwu sâmune nâņgâņet. Emet inâņņan Kutdânenņahât aposololipņe lok perâkņe yengât nâņgâm den yuwu sâm yen ekyongowi ya mem biwiyenęan katmâ nâņgâm manņetgât naņgan.

<sup>18</sup>Den yamâ yuwu sâwi. Sâp pato tâlâhuwuap yan lohimbi nombotņeņe

yeŋe eŋgatyeyeāk watmâ Anitâhât den kum yu ya ekŋâlem otmâ hilipgunomai. Yawu otŋetâ Anitâŋe yakât matŋe yinŋiwuap sâŋ yeŋe ekyongonomai. Yawu ekyongonŋetâ nânŋâŋetâ porap otmu yeŋgât den kakŋan sâŋ senyeŋan genomai. <sup>19</sup>Yawu gârâmâ sâp yiwerene yuâmâ yâkŋe biwiyene alitŋetâ Wâtŋât mâmâŋahât Heakŋe nânŋân nânŋân âlepŋe âlâ biwiyenân ki katmap. Yawu otmâ lokgât nânŋân nânŋân tâŋât watmâ Kiristohât lohimbî yeŋgât eŋgatyenân geŋetâ hioŋakmai.

<sup>20-21</sup>Yâhâ yenâmâ Anitâhât den bulâne kâsikum yinŋimunŋe nânŋâwi. Den ya tiŋâk lâum yâkât amutgen manŋetâ tihityeŋe otbuap. Yawu otmu Wâtŋât mâmâŋahât Heakŋe mem hewewen tuhuyekmu bukulipyene yeŋgât nânŋâm Anitâ ulitgum mannomai. Otmu sâp pato tetewuap yan Kiristone âwurem ge meyekmu Anitâŋe yekmu ârândâŋ otmu umam sâyinŋim manman kârikŋan katyekmu mannomai. Yakât nânŋâm bukulipyene orop Kiristohâlen biwiyenâŋe kepeim mambotbaŋgim mannomai.

<sup>22</sup>Otmu lohimbî nombotŋe Anitâhât den nânŋâm biwi yâhâp otmai. Lohimbî yawuyamâ lohotŋanâk otyinŋim den kâsikum yinŋinomai. Yawu otyinŋinŋetâ nânŋâŋetâ keterakyinŋimu yanâmâ yâkŋe Kiristohâlen biwiyenâŋe tiŋâk kepeim mannomai.

<sup>23</sup>Yâhâ lohimbî nombotŋe âlâ yeŋgât nânŋâm den âlâen hâum sâmune nânŋâŋet. Bukunenŋe âlâhât emet semu imbiŋe naomŋe meyekmu in yawu hânân kioŋnomai. Yakât dopŋeāk sâp patoen lohimbî nombotŋe hem kâlâwân kioŋmaihât Kiristohât den kâsikum yinŋinŋetâ nânŋâm yâkâlen biwiyenâŋe tiŋâk kepeim mannomai.

Yâhâ lohimbî nombotŋe âlâŋeâmâ biwiyene kârikŋe otmu orotmeme bâleŋe otnehâlâk nânŋâm manmai. Lohimbî yawuya yeŋgât nânŋâm tepyeŋe nânŋâyinŋinomai. Yawu gârâmâ yâkŋe otmai yawu ki otnomai.

### Anitâ mepaeop.

<sup>24-25</sup>Ambonenŋe Anitâ yahat yahatŋe embânŋâmbâek tat tat kârikŋe tatmâ gaopŋak tatmâ gamap. Otmu tatmâ yâhâmbisâp. Yeŋe manman bâleŋahât paŋŋonân kioŋmaihât Anitâ wâtŋât Amboŋe tihityeŋe otmu Yesu Kiristohâlen biwiyenâŋe kepeim mannomai. Yawu manŋetâ meyekmâ nine nanne baratne koko salek sâŋ ikŋe laŋinŋe himbimân tap yan katyekmu herone kakŋan manmâ yâhâmbisâi. Yakât nânŋâm herone nânŋâwâŋgim mepaem yâhâmbisâin. Ya bonŋanâk.

Nâ bukuyeŋe,  
Yut